

Jongbaueren- a Jongwënzerdag 2014

Fir datt d'Gesellschaft an déi politesch Responsabel, d'Stärkten vun de Landwirtschaftleche Betriber nees schätze léieren

Usprooch vum Jeff BOONEN, President vun de Lëtzebuerger Jongbaueren a Jongwënzer

E schéine gudden Owend, Dir Dammen an Dir Hären,

Am Numm vun de LJB&JW hunn ech d'Éier, fir ganz häerzlech um dësjäregen Jongbaueren- a Jongwënzerdag ze begréissen :

- eise fréieren Nationalaumônier, den Här Chanoine Leo WAGENER, Bëschofsvikar, a Verriedung vum Här Äerzbëschof Jean-Claude HOLLERICH, deen ech op dëser Plaz entschëllegen,
- den Här Fernand ETGEN, Landwirtschaftsminister,
- den Här Léon WIETOR, Direkter vun der ASTA,
- den Här Pierre TREINEN, Direkter vum SER,
- den Här Dr. Felix WILDSCHUTZ, Direkter vun der Veterinärinspektioun,
- den Här Tom DELLES, Direkter an der Ackerbauschoul,
- den Här THILL, Direkter vum Pensionat,
- d'Hären an d'Dammen Députéiert :
 - o d'Madame Martine HANSEN,
 - o den Här Aly KAES,
 - o den Här Emile EICHER,
- den Här GAASCH, President vun der Landwirtschaftskammer,
- d'Verrieder vun de landwirtschaftleche Gewerkschaften an Organisatiounen,
- d'Verrieder vun der geschriwwener Press,
- **den Här Professor Dokter Thore TOEWS, eise Referent vum Owend**
- an zu gudder Lescht, d'Memberen a Sympathisante vun de LJB & JW.

Entschëllege wëll ech d'Dammen Sylvie ANDRICH-DUVAL, Astrid LULLING, Octavie MODERT an d'Häre Gusty GRAAS, Roy REDING a Marco SCHANK.

Dir Dammen an dir Hären,

Wéi mir virun e puer Méint am Comité zesumme souzen, hu mir äis entscheed, als Thema vum Owend, de Familljebetrieb ze huelen. Et war äis wichteg, fir am internationale Joer vun der familljebedriwwener Landwirtschaft, d'Fro ze stellen, ob de Familljebetrieb - wéi mir en haut kennen - nach eng Zukunft huet, oder ob aner Forme vu Betriber an Zukunft wäerten néideg sinn, fir eng kompetitiv Landwirtschaft ze bedreiwen. Ech sinn dofir frou, datt mir mam Här Professor Dr. Thore Toews e Riedner fonnt hunn, deen a sengem Virtrag beliichte wäert, wat an Zukunft vun eise Betriber verlaangt gëtt - dat aus gesellschaftlecher oder maartwirtschaftlecher Siicht - a wéi d'Betriber sech dorobber astelle mussen.

De Begrëff Familljebetrieb ass net kloer definéiert an ass an dësem internationale Joer eigentlech haaptsächlech benotzt ginn, fir eng Ëffentlechkeetsaarbecht fir d'Landwirtschaft ze maachen. Et fënnt een awer e puer Charakteristiken an de landwirtschaftleche Familljebetriber erëm:

- Decisionskraaft läit an der Famill,
- d'Famill huet Verfügung iwwert d'Land - sief et am Eegentum oder iwwer d'Pacht,
- d'Aarbecht gëtt haaptsächlech vu Familljememberen assuréiert,
- an d'Wëssen an d'Erfahrung gi vun enger Generatioun an déi nächst weiderginn.

Dëst si ganz wichteg Bestanddeeler vum Familljebetrieb a stäerkt en. De jonke Bauer muss natierlech ausgebild ginn a muss sech och weiderbilden. Mee e groussen Deel vun der Wëssensverméttlung fënnt doheem am Betrib statt. D'Kombinatioun heivunner - zesumme mat der Schoul - mécht aus de jonke Bauere gutt ausgebildete Leit, déi capabel sinn, e Betrib selbstänneg ze féieren. Dëst ass dach eng optimal Ausgangspositioun fir déi zukünftige Erausforderungen an der Landwirtschaft ze léisen. A villen Deeler vun eiser Wirtschaft ginn esou Leit iwwert laang Zäit, an mat vill Käschten ausgebild.

An ech hoffen, dass eis Gesellschaft an eis politesch Responsabel aus der Regierung dës Stärkte vun eise landwirtschaftleche Betriber erëm schätze léieren an och unerkennen. Et huet een nämlech iwwert déi lescht Joren - a virun allem déi lescht Méint - ëmmer méi d'Gefill kritt, datt jiddereen der Meenung ass, besser ze wëssen, wéi ee Landwirtschaft bedreiwe soll, wéi de Bauer selwer.

Den Interessi fir eis Uleies oder fir eis *Point de Vuen* ass allgemeng éischer kleng. Op landwirtschaftleche Manifestatiounen oder Versammlungen, kënnt kee vun deene Leit - déi der Landwirtschaft soen, wéi se ze funktionéieren huet - vun sech aus lauschteren, wat d'Landwirtschaft

ze soen huet. Ech froe mech z.B. wou haut den Owend d'Vertrieder aus der Agrar- an der Ëmweltkommissioun vun eise Regierungsparteien sinn?

Déi reduzéiert Unerkennung vun eisem Beruf war och de Grond, firwat dës Woch verschidde landwirtschaftlech Organisatiounen - dorënner och d'LJB&JW - an d'Däichhal op Ettelbréck op e Meeting invitéiert haten. Mir hunn op der Plaz drop higewisen, datt mir e staarke Secteur sinn, datt mir vill Leeschtunge bréngen an datt mir mat decidéiere wëllen, wéi eis Betriber sech an Zukunft entwéckele sollen. Ech behaupten, datt et eng gelongen Aktioun war, well méi ewéi 1.000 Leit friddlech un dësem Meeting Deel geholl hunn, an de Secteur gemeinsam seng Iwwerleeungen a Fuerderungen duergestallt huet.

An dës Fuerderunge passen och ganz gutt an d'Thema vun haut den Owend. Et kann dach net sinn, datt eis Familljebetriber d'Verfügungsgewalt iwwert hiert d'Land verléieren, well de Staat sech en Expropriations- an e Virkafsrecht gëtt. Et kann och net sinn, datt eis Betriber mat ëmmer méi Direktiven, Oplagen, Kontrollen an administrativem Opwand zougetippt ginn. Mat allen Oplagen - mir wäerten an der Stellungnahm nach mat engem Beispill drop zeréckkommen - schwäche mir d'Familljebetriber an driiwen de Strukturwandel nach méi schnell virun.

Ech maachen hei nach eemol en Appell un Iech, Här Minister Etgen, d'Suerge vun dem Secteur elo mat bei Är Regierungskollegen ze huelen an dann entspreichend ze handelen. D'Landwirtschaft brauch och keen Affekot, mee e Minister, dee konkret Léisunge virschléit an esou handelt, dass eis Betriber gestärkt an d'Zukunft ginn. D'Léisunge solle virun allem aus Ärem Ministär kommen an net aus anere Ministären! Mir wëssen, dass déi d'Problemer oft nëmmen eesäiteg gesinn!

An deem Zesammenhang fuerderen ech d'Regierung op, d'Kompetitivitéit vun der Lëtzebuerger Landwirtschaft erëm un déi éischt Stell an der Agrarpolitik ze setzen. Et ass jo eng Realitéit, datt mir eis Produkter fir europäesch a Weltmaartpräisser produzéieren. Mir schwätzen zwar gäre vu regionale Mäert, mee a Wierklechkeet ass awer keen dorunner interesséiert. Firwat soss gëtt am Kader vun de Spuermoossnahmen net gezéckt, fir an de Lëtzebuerger Promotiounsprogrammen ze spueren?

Op eise Betriber musse mir kompetitiv sinn, fir bei deenen aktuelle Maartpräisser produzéieren an e Gewënn maachen ze kënnen. Well soss si mir net méi laang mat dobäi! An d'Virgab fir d'Zukunft ass kloer: ëmmer méi bëlleg produzéieren an awer d'Ëmwelt nohalteg schützen. De sougenannte „Méi

mat manner“! Ech sinn iwwerzeegt, datt Optiméierungspotential an eise Betriber a Systemer stécht. Dee wäert awer ni iwwer Direktiven, Oplagen a Verbueder erreecht ginn!

E Beispill: Dir kënnt de Rapsbau elo verbidden, fir ze verhënneren, datt Metazachlor an d'Waasser kënnt. Wat sinn d'Konsequenzen? Manner Residuen am Waasser, mee och manner Raps hei zu Lëtzebuerg an domat manner Sue fir d'Landwirtschaft, an zum Schluss e manner motivéierte Bauer. Ech sinn der Meenung, datt hei éischter d'Léisung doranner stécht, fir de Problem zesumme mam Bauer unzepaken, d'Landwirtschaft se sensibiliséieren an ze motivéieren aner Bewirtschaftungsmoossnahmen unzewennen. Wann ech als Betrib iwwerzeegt gi sinn, da setzen ech eng Moossnahm ëm. Wann ech eng Oplag oder e Verbuet kréien, dann sinn ech schonn negativ agestallt. Motivéiere geet haaptsächlech iwwer zwee Weeër: eng Prime bezuelen, déi de Risiko an den Opwand vum Betrib dréit. Oder beweisen, datt eppes funktionéiert an dem Bauer méi Suen erabrénge, d.h. do ass d'Berodung, d'Wëssenschaft an den Austausch gefuerdert.

Zum Schluss, wëll ech dofir betounen, dass et wichteg ass, keng Budgeten an der Landwirtschaft ze kierze wa mir all Erausforderungen an Zukunft meeschtere wëllen. D'Familljebetriber an den Dierfer, eng héichwäerteg Liewensmëttelproduktioun, den Ëmweltschutz an d'Landschaftsfleeg brénge jidderengem eppes. Dat dierfe mir net op d'Spill setzen an enger nationaler oder europäescher Spuerpolitik.

Léif Leit,

Loosst mech dann, fir ofzeschléissen nach e puer Mercien ausschwätzen, fir déi respektiv moralesch a finanziell Ënnerstëtzungen, déi eiser Organisatioun zegutt kommen:

- E grouse Merci geet un de Bistum, fir d'Ënnerstëtzungen, déi eis Raimlechkeeten an d'Personal am Centre Convict betrëffen. Mir wëssen dat ze schätzen !
- E weidere Merci geet un den Här Minister Etgen an un seng Verwaltungen. Mir si frou, datt mir esou e gudde Kontakt hunn. Ech wëll op dëser Plaz betounen, datt mir dëst Joer vill gutt Reuniounen haten, virun allem fir d'Preparatioune vum PDR.

Här Minister, mir si jo och amgaangen – zesumme mam Service Jeunesse - e Seminar vun den europäesche Jongbaueren ze organiséieren, deen am Kader vun der Lëtzebuenger Presidency

während der Foire Agricole hei zu Ettelbréck soll stattfannen. Ech maachen hei nach emol een Opruff un lech, fir äis déi néideg finanziell Ënnerstëtzungen aus Ärem Ministär zoukommen ze loosse. Et wir dach extrem schued - an och dee falsche Message - wann dëse landwirtschaftlechen Héichpunkt während der EU-Présidence iwwer aner Ministären an aner Partner misst finanzéiert ginn!

Weider Mercie ginn un:

1. Un déi Verantwortlech vum Nohaltegkeets- a vum Familljeministär an un hir zoustänneg Verwaltungen. Mir si frou, datt mir ëmmer nees mat eisen Uleies bei si komme kënnen;
2. Un all déi landwirtschaftlech Organisatiounen, mat deene mir zesummeschaffen;
3. Un de Lycée Technique Agricole a speziell un den Här Direkter Tom Delles, fir d'Raimlechkeeten, déi mir iwwer d'Joer erduerch - an och haut nees - zur Verfügung gestallt kréien;
4. Un eisen Nationalaumônier, den Abbé Romain Richer, deen äis ëmmer gutt zur Säit steet.
5. Ech wëll eis Leit an der Zentral am Centre Convict net vergiessen – de Franz, deen äis ëmmer mat Rot an Dot zur Säit steet, d'Madame Chantal Heuschling-Rischette, déi d'Sekretariatsaarbecht assuréiert an d'Madame Jacqueline Monville, déi fir d'Kooperationsprojete vun eiser ONG zoustänneg ass.
6. E grouse Merci geet vu menger Säit aus och un eisen neie Landwirtschaftsberoder, de Claude Petit, deen d'Erausfuerderung ugeholl huet, fir fir d'LJB&JW an den OekoZenter ze schaffen. De Claude schafft zënter dem 1. November fir eis 2 Organisatiounen, a soll elo am Beräich vum Leguminosen-Ubau an dem reduzéierte Sprëtzméttelasaz nei Denkestéiss ginn. Ech si mir sécher, dass hien e puer interessant Usätz an den nächste Joren op verschiddeenen Betriber wäert ëmsetzen.
7. Da wëll ech de Memberen aus dem Nationalcomité an dem Präsidium e grouse Merci soen, fir hire politeschen Asaz - sief dat op europäeschem oder nationalem Plang. Ouni hire benevolen Asaz kéinte mir keng esou grouss Präsenz weisen.
8. E weideren a leschte Merci geet un den Aarbechtsgrupp Zuucht an un eis regional Gruppe vun der Lëtzebuerger Landjugend – Jongbaueren a Jongwënzer, déi dat ganz Joer iwwer eng Hand mat upaken, wann se gebraucht gëtt.

Ech soen lech Merci!